

ԵՐՎԱՆԻՆԻ ԱՐՔԱՅԱՏՈՂԻԸ ՀԱՅԱՍՏԱՆՈՒՄ

Ա. Մ. ԿՐԿՅԱՇԱՐՅԱՆ

Մովսես Խորենացու «Հայոց պատմությունից» տեղեկանում ենք Հայաստանում տիրած երկու արքայատոհմերի մասին. 1. Հայկյան (Հայկազունի), որն իբր իշխել է նախասկզբնական ժամանակներից մինչև Վահե Վահունին, որին պատմահայրը համարում է Ալեքսանդր Մակեդոնացու ժամանակակից (մ. թ. ա. 330—320-ական թթ.), 2. Արշակունի թագավորներ՝ սկսած Վաղարշակից մինչև Արտաշես վերջինը, երբ վերադավ Արշակունիների թագավորությունը (428 թ.): Բսկ այս արքայատոհմերի միջև ընկած շուրջ երկդարյա ժամանակահատվածի համար Խորենացին չի դրում, թե ովքե՞ր են իշխել Հայաստանում: Ահա պատմահոր խոսքերը. «Սա (Վահե—Ա. Կ.) ընդվզեալ մեռանի յԱղեքսանդրէ Մակեդոնացոյ: Յայսմ հետէ մինչև ցթագաւորութիւնն Վաղարշակայ ի Հայս՝ ոչ ինչ ճշմարտագոյն ունիմ պատմել քեզ. քանզի շփոթիմն ամբոխից լեալ՝ այր զարամբ ելանէին տիրել աշխարհիս»¹:

Խորենացու մատյանի առաջին դիրքը գրեթե ամբողջապես նվիրված է Հայկազունի տոհմի պատմությանը, որտեղ գերիշխում են դիցարանական-առասպելական տարրերը: Այսուհանդերձ, պատմահոր մոտ Հայկազունիների շարքում դասված մի քանի թագավոր (Տիգրան, Արտավազդ) պատմական անձնավորություններ են:

Խորենացու մշակած այս սխեման հայագետների կողմից ընդունվում էր ընդհուպ մինչև XIX դարը: Նույնիսկ այբալեզու սկզբնաղբյուրների այնպիսի գիտակ, ինչպիսին էր Միքայել Չամչյանը, իր «Պատմության» մեջ համարյա նույնությամբ հետևում է Խորենացու շարադրանքին²: Ծիշտ է, նա իրավացիորեն մատնանշում է օտար, հատկապես հռոմեական աղբյուրների միտումնավորությունը, սակայն օտար պատմիչների նկատմամբ իր քննադատությանը ընթացքում Չամչյանն, ընկնելով հակառակ ծայրահեղություն մեջ, այդ հեղինակներից մեր պատմությանը վերաբերող այն հատվածներն է վերցրել միայն, որոնք համապատասխանում էին Խորենացու պատմությանը, քանի որ վերջինիս նա համարում է ստուգագույնը բոլորից³: Ուստի և Չամչյանը, հետևելով Խորենացուն, նշում է, որ Հայկից հետո մինչև Վահե թագավորը Հայաստանում եղել է «Հայկազանց հարազատ իշխանութիւն», իսկ այնուհետև՝ «ընդ կուսակալութեամբ այլոց՝ մինչ՝ ցարշակունեաց տէրութիւն»⁴:

Նշենք, որ պատմահայրը Հայկազունի տոհմը չի համարում թագավորական, այլ Հայկին ու նրա հետնորդներին պարզապես անվանում է նահապետներ: Սա արտացոլում է պատմական այն ժամանակաշրջանը, երբ հայկական ցեղերը սկսում էին միավորվել և հասել էին սոցիալ-տնտեսական ու

1 «Մովսիսի Խորենացոյ Պատմութիւն Հայոց», Ա. լր., Թիֆլիս, 1913:

2 Միքայել Չամչյան, Պատմութիւն Հայոց, հատ. Ա, Վենետիկ, 1784:

3 Նույն տեղում, էջ 35—40:

4 Նույն տեղում, էջ 51:

քաղաքական զարգացման այն մակարդակին, որը հայտնի է որպես ռազմական դեմոկրատիայի շրջան: Ուստի մեզ բոլորովին պատահական չի թվում այն, որ Հայկի հետնորդներից Զարմայր նահապետը ժամանակակից է Տրոյական պատերազմին⁵:

Խորենացու մոտ հայոց առաջին թագավորը Սկայորդի Պարույրն է, որից սերածների թվում են Երվանդ Սակավակյացը և սրա որդի Տիգրան Երվանդյանը, բրոնց ևս պատմահայրը հիշատակում է իբրև հայոց թագավորների⁶:

Անտիկ աղբյուրների տվյալները ստիպեցին ստուգել Խորենացու հաղորդածը այդ աղբյուրների վկայություններով և վերանայել նրա մատյանի հիման վրա կազմված՝ Հայաստանում իշխած արքայատոհմների սխեման, քանի որ անտիկ հեղինակները բոլորովին այլ պատկեր են ուրվագծում, քան Խորենացին⁷:

Ա. Մ. Գարագաշյանը թեպետև հանդես եկավ Խորենացու քննադատությամբ, այդուհանդերձ վերահիշյալ հարցում չկարողացավ հաղթահարել պատմահոր ազդեցությունը: Եվ դա այն դեպքում, երբ նա ընդհանրապես նախապատվություն տալիս է հունական աղբյուրների հաղորդած տեղեկություններին: Ա. Մ. Գարագաշյանը հայ ժողովրդի պատմության հին շրջանը բաժանում է նախապատմական և պատմական ժամանակների, նշելով, որ առաջին շրջանում Հայաստանում առաջացել է Արարատյան թագավորությունը, որը գոյություն է ունեցել մինչև Աքեմենյան Դարեհ Ա-ի կողմից Հայաստանի նվաճվելը: Ա. Մ. Գարագաշյանը այնուհետև գրում է, որ Սելևկյանների ժամանակ Հայաստանում «հարյավ արդարև նոր Արարատյան թագավորություն մը, ի մոխրո հին Արարատյան թագավորության, Արշակունյաց թագավորություն անվամբ»⁸:

Դժվար չէ նկատել, որ Ա. Մ. Գարագաշյանը չի հիշատակում ոչ Երվանդունիներին, ո՛չ իսկ Արտաշեսյաններին որպես առանձին արքայատոհմ և մ. թ. ա. II դարի սկզբին Հայաստանում Արտաշեսի հաստատած տերություններ համարում է Արշակունյաց թագավորություն: Նույն տեսակետն է նա կրկնում տարբեր առիթներով⁹: Այնուամենայնիվ թվում է, թե Գարագաշյանը ինչ-որ տարբերություն դնում է Արտաշեսի և Տրդատ Ա Արշակունու հետնորդների միջև, երբ խոսելով հայոց թագուհի էրատոյի մասին, նրան համարում է «վերջինն ի ցեղեն Արտաքսիասա, որով կմարի Արտաքսիասյան հարստությունը»¹⁰: Ըստ երևույթին, Ա. Գարագաշյանը Արտաշեսին և Տրդատին

5 Մ'ո վ ս ե ս Խ ո ռ ե ն ա ց ի, Ա, լր:

6 Նույն տեղում, իր-լր:

7 Լ. Փ. Շահինյանը Խորենացու ժամանակագրական համակարգին էվիրված իր ուսումնասիրություններում անվերապահորեն ընդունում է Խորենացու սխեման և պնդում, թե Հայաստանում չեն եղել ո՛չ Երվանդունիներ, ո՛չ էլ Արտաշեսյաններ, որ վերջիններս պատկանել են Արշակունի տոհմին (տե՛ս Լ. Փ. Շահինյան, Պարսիկ Արշակունիների հարստության հաստատման թվականը ըստ Խորենացու, «Պատմա-քաղաքական հանդես», 1966, № 1, էջ 155—172: Նույն ինչպիսին է Մովսես Խորենացու «Հայոց պատմության» ժամանակագրական համակարգը, «Բանբեր Մատենադարանի», 1967, № 8, էջ 21—56 և այլ հոդվածներ):

8 Ա. Մ. Գարագաշյան, Քննական Պատմություն Հայոց, մասն Ա, Թիֆլիս, 1895, էջ 78:

9 Նույն տեղում, էջ 1, 81, 83, 193 և այլ:

10 Ա. Մ. Գարագաշյան, Բնական Պատմություն Հայոց, մասն Բ, Թիֆլիս, 1895, էջ 196:

համարում է նույն Արշակունի արքայատոհմի տարբեր ճյուղերի ներկայացուցիչներ:

Այն, որ վերոհիշյալ թագավորական երկու տոհմերի՝ Արշակունի հարստության պատկանելը հիրավի կասկածներ է առաջացրել Ա. Գարազյանի մոտ, երևում է նաև նրա հետևյալ դատողություններից. «...Արշակունի կնշանակե արքունի, թագավորական», հայերեն Արշակ անունեն, որ ...կնշանակի արքա...: Դիտողության արժանի է, որ մեր պատմության մեջ ուրիշ մը Արշակ կոչված չենք գտներ: Հայք արիական բառով արշակունի կոչեցին հին Արարատյան թագավորության ցեղը»¹¹: Այս դիտողությունը, սակայն, բավական չի եղել, որպեսզի Գարազյանը հանգեր Արտաշեսյան և Արշակունի թագավորների՝ տարբեր արքայատոհմերի պատկանելու տեսակետին:

Հայ պատմագիտության մեջ, ինչքան մեզ հայտնի է, առաջին անգամ Դ. Խալաթյանցն էր, որը որոշակիորեն տարանջատեց Արշակունիներին և Հայաստանում նրանց նախորդած գահակալներին: Նա գրում է. «... պարթև Արշակունիների արքայատոհմը, հակառակ Խորենացու և նրա աղբյուրի՝ կեղծ-Ագաթանգեղոսի կամ Մար-Աբասի հաղորդման, կարող էր Հայաստանում հաստատվել միայն Տիգրանից և Տիգրանյաններից հետո»¹²: Իր այս տեսակետը առավել պարզ դարձնելու համար Դ. Խալաթյանցը նույն էջում տողատակի ծանոթագրության մեջ նշում է, որ Փավստոսի մոտ Տիգրանի՝ Արշակունի անվանելը պետք է հասկանալ ոչ թե Տիգրանի՝ պարթև Արշակ Ա-ից սերած լինելու իմաստով, այլ Հայաստանի թագավորական հարստության իմաստով, քանզի «արշակ» նշանակում է «թագավոր»:

Հայաստանում թագավորական երկու տարբեր արքայատոհմերի առկայությունն առանձնապես շեշտված է Ն. Ադոնցի մոտ, որը Արշակունյաց հարստությանը նախորդած գահակալներին անվանում է Տիգրանյաններ՝ Տիգրան Մեծի անունով: Նա գրում է. «Արշակունիների հանդես գալուն նախորդած շրջանը արտաքին տեսակետից կարելի է անվանել Աթեմենյան, իսկ ներքին տեսակետից՝ Տիգրանյան, այն հարստության անունով, որից սերում էին Արտաքսիասը և Զարիադրիսը և նրանց հռչակավոր հետնորդ Տիգրան Նորորդը»¹³: Ն. Ադոնցը նույն այս պարբերությանը կցել է հետևյալ տողատակի ծանոթագրությունը, որն ունի բացառիկ նշանակություն. «Սովորաբար կարծում են, թե Հայաստանում մինչարշակունյան թագավորական հարստությունն իր սկիզբը առնում է Արտաքսիասից ու Զարիադրիսից: ...Չենք կասկածում, որ Արտաքսիասի տոհմը ծագում է Աթաշակի ժամանակակից Տիգրանից:... Տիգրանի հարստության առաջին հայտնի ներկայացուցչի անունով և հռչակավոր նվաճող Տիգրան Մեծի պատվին մինչարշակունյան շրջանը անվանում ենք Տիգրանյան»¹⁴:

Ն. Ադոնցը դարձյալ այս հարցին անդրադառնալով, ավելի որոշակի գրում է. «Մեր թվագրության սկզբում, ավելի ճիշտ՝ 36 թ., Տիգրան IV-ի մահվամբ հատվեց Հայաստանում Տիգրանյանների հարստությունը»: Այս տողերին կցած իր ծանոթագրության մեջ Ն. Ադոնցը տալիս է երկու արքայա-

¹¹ Նույն տեղում, մասն Ա, էջ 83:

¹² Г. Халатянц, Армянские Аршакиды в «Истории Армении» Моисея Хоренского, ч. I, М., 1903, էջ 5:

¹³ Н. Адонц, Армения в эпоху Юстиниана, СПб., 1908, էջ 389:

¹⁴ Նույն տեղում, էջ 390:

տոհմերին՝ Տիգրանյաններին (իմա՝ Արտաշեսյաններին) և Արշակունիներին պատկանող գահակալների ցուցակը¹⁵։

Պրոֆ. Լևոն ևս իր «Հայոց Պատմության» մեջ պարզորոշ սահմանադատում է Արտաշեսյաններին ու Արշակունիներին և առանձին-առանձին փորձում է տալ դրանցից յուրաքանչյուրի պատմությունը։ Հայաստանում Արշակունյաց թագավորության հիմնադիր Տրդատ Ա-ին նա համարում է «շարունակող այն մեծ գործի, որ Արտաշեսյան հարստության իսկական փառքն է կազմում»¹⁶։

Վերևում շարադրվածից պարզ երևում է, որ նախասովետական հայագետներից և ոչ մեկը չի անդրադարձել հնագույն ժամանակներում Հայաստանում գահակալած մի երրորդ, ոչ պակաս կարևոր արքայատոհմի՝ Երվանդունիների պատմությանը։ Ն. Ադոնցի մոտ նկատելի է այն, որ նա Տիգրանյանների (նույնն է թե՛ Արտաշեսյանների) գահակալությունը ճիշտ կերպով բաժանում է երկու շրջանի՝ մ. թ. ա. VI դար և II—I դարեր, շանդրադառնալով, սակայն, IV—III դդ. Արտաշեսյաններին նախորդած Երվանդունիների թագավորության հարցին։ Մեկ այլ առիթով Ն. Ադոնցը նշում է, թե հայկական մարզերից Փոքր Հայքը առաջինն էր, որ Աքեմենյան տերության փլատակների վրա ձեռք բերեց քաղաքական անկախություն և կառավարվում էր իր հայրենի թագավորների կողմից, դեռևս Ծոփքում՝ Զարեհի և Արաքսի հովտում՝ Արտաշեսի թագավորությունների առաջացումից շատ առաջ¹⁷։ Շարադրանքից հետո է նկատել, որ Ն. Ադոնցը չի խոսում Հայաստանում գահակալած Երվանդունի արքայատոհմի մասին։

Լևոն նույնպես չի նշում Երվանդունիներին և մինչև Արտաշեսը Հայաստանի իշխանավորներին համարում է Սելևկյան թագավորների սատրապներ¹⁸։

Սովետահայ պատմագրության նվաճումներից է այն, որ առկա սկզբնաղբյուրների մանրակրկիտ ուսումնասիրության հիման վրա վեր հանվեց Աքեմենյան Պարսկաստանի լուծը թոթափելուց հետո Հայաստանում հաստատված Երվանդունիների քաղաքական և, մասամբ, սոցիալ-տնտեսական պատմությունը։ Այս հարցում առաջին երախտիքը պատկանում է ակադ. Հ. Մանանդյանին¹⁹։ Այնուհետև Երվանդունիներին անդրադարձել և անդրադառնում են մի շարք պատմաբաններ²⁰, ի դեպ նշենք, որ նրանցից շատերը Ուրարտուի անկումից անմիջապես հետո մ. թ. ա. VI դ. առաջին կեսում Հա-

15 Նույն տեղում, էջ 427—428։

16 Լ և ո, Երկեր 10 հատորով, հատ. 1, Երևան, 1966, էջ 352։

17 Н. Адо́нц, նշվ. աշխ., էջ 66։

18 Լ և ո, նշվ. աշխ., էջ 352։

19 Հ. Հ. Մանանդյան, Քննական տեսություն հայ ժողովրդի պատմության, հատ. Ա, Երևան, 1944, էջ 104։

20 С. Т. Еремян, Основные черты общественного строя Армении в эллинистическую эпоху, «Изв. АН АрмССР», 1948, № 11; Его же, Развитие городов и городской жизни в древней Армении, «Вестник древней истории», 1953, № 3; К. В. Тревер, Очерки по истории культуры древней Армении, М.—Л., 1953, էջ 120; Г. Х. Саркисян, Тигранакерт, М.—Л., 1950, էջ 30—31; С. М. Кркаяшарян, Возникновение городов в Армении во II в. до н. э.—III в. н. э., «Научные доклады высшей школы. Исторические науки», 1961, № 4, էջ 150—151; Գ. Ա. Տիրացյան, Երվանդունիները Հայաստանում, ՀՍՍՀ ԳԱ «Տեղեկագիր» (հաս. գիտ.), 1958, № 6, էջ 61 և հտ.։ Նույնի՝ Հին հայկական պետության առաջացումը, «Պատմա-բանասիրական հանդես», 1966, № 4, էջ 83 և հտ.։ Հ. Ժամկոչյան, Հայաստանը նախնադարյան համայնական հասարակության և ստրկա-

յաստանում իշխած տիրակալներին համարում են Երվանդունիներ. այս տեսակետին անցյալում տուրք ենք տվել նաև մենք²¹. մինչդեռ, ինչպես տեսանք, Ն. Ադոնցը նրանց անվանում է Տիրառնյաններ և այդ տարիները համարում է Արտաշեսյանների գահակալման առաջին շրջան: Մեր կարծիքով, առավել ճիշտ է Ն. Ադոնցի տեսակետը: Փորձենք հիմնավորել մեր այս կարծիքը:

Տեսնենք, թե աղբյուրներից ի՞նչ տվյալներ են ունեցել վերոհիշյալ ուսումնասիրողները ենթադրելու, որ մ. թ. ա. VI դ. առաջին կեսին Հայաստանում հաստատվել է Երվանդունիների իշխանությունը: Փաստորեն միայն մեկ տրվյալ՝ Երվանդ Սակավակյացի հիշատակությունը խորենացու մատյանում մեջ բերված արքայացանկերից մեկում իբրև մարաց Աթղահակ թագավորի ժամանակակից²², Այնուհետև այս Երվանդը ոչ մի տեղ չի հիշատակվում, նույնիսկ խորենացու մոտ: խորենացու պատմելով, Երվանդ Սակավակյացին հաջորդել է Տիրառն Երվանդյանը: Հայագետներն այն կարծիքին են, թե իրենց հաջորդվել է Քսենոփոնի «Կյուրոսյեդիա» երկում գտնել խորենացու այս հաղորդման հաստատումը: Իրոք, Քսենոփոնը, խոսելով այդ նույն ժամանակաշրջանի մասին, հաճախ հիշատակում է հայոց թագավորին, առանց նրա անունը տալու, և նրա Տիրառն անունով որդուն: Եվ ահա Քսենոփոնի թողած բացը լրացնում են խորենացու վկայության հիման վրա, որից էլ ելնելով, Քսենոփոնի տվյալների մեջ փոխադարձաբար տեսնում են խորենացու վկայության հաստատումը և ենթադրում, որ այդ ժամանակից է Հայաստանում հաստատվում Երվանդունիների արքայատոհմը, որի ներկայացուցիչները հետագայում ևս, Արեմենյանների տիրապետության շրջանում, շարունակում են տիրել Հայաստանում իբրև արքայից արքայի սատրապներ: Եթե այս տեսակետին են Ս. Երեմյանը, Հ. Ժամկոչյանը և նրանց հետևելով, Ժ. Էլիբեկյանը²³, ապա Գ. Տիրացյանը Երվանդունիներ համարելով թե՛ VI դ. Հայաստանի տիրակալներին, և թե՛ Արեմենյան տիրապետության ժամանակ Հայաստանի սատրապներին, այնուամենայնիվ, առկա փաստերի մեջ իրավացիորեն հակասություններ տեսնելով, չի պնդում այդ երկու Երվանդյանների միևնույն արքայատոհմին պատկանելու տեսակետը²⁴:

VI դ. սկզբին Հայաստանում Երվանդունիների արքայատոհմի գոյության մասին ենթադրությունը, մեր կարծիքով, լուրջ հարցականի տակ դնող փաստարկներն ավելի շատ են, քան դրա օգտին խոսողները:

տիրության շրջանում, Երևան, 1961, էջ 174 և հտ.: Գ. Սարգսյան, Հելլենիստական դարաշրջանի Հայաստանը և Մովսես խորենացին, Երևան, 1966, էջ 71—82 և հտ.: Ս. Մ. Կրկյան, Դիտողություններ հին հայկական տաճարային քաղաքների առաջացման մասին, ՀՍՍՀ ԳԱ «Տեղեկագիր» (հաս. գիտ.), 1963, № 9, էջ 55—60: Նույնի՝ Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 82—88 և 122—129: «Հայ ժողովրդի պատմություն», հատ. 1, էջ 435—442 և 503—520: Ժ. Գ. Էլիբեկյան, Երվանդունիների ծագման հարցի շուրջը, «Պատմա-բանասիրական հանդես», 1971, № 2, էջ 107—115:

21 Ս. Մ. Կրկյան և շարյան, Հին Հայաստանի և Փոքր Ասիայի քաղաքների պատմության դրվագներ, էջ 88:

22 Մովսես խորենացի, Ա, իր:

23 Հ. Ժամկոչյան, Հայաստանը նախնադարյան-համայնական հասարակության և ստրկատիրության շրջանում, էջ 174 և հտ.: «Հայ ժողովրդի պատմություն», հատ. 1, էջ 435—441: Ժ. Էլիբեկյան, Երվանդունիների ծագման հարցի շուրջը, էջ 107—115:

24 Գ. Ա. Տիրացյան, Երվանդունիները Հայաստանում, էջ 69—70: Նույնի՝ «Անարատ» և Հայաստանը (Քսենոփոն, Անարատիս, Երևան, 1970 զրբում), էջ 228—230:

1. Խորենացու մոտ Երվանդի «Սակավակյաց» մակդիրն ինքնին վկայում է այն մասին, թե նրա գահակալությունը կարճատև է եղել կամ թե, ավելի ճիշտ, Երվանդը կարճ կյանք է ունեցել: Մինչդեռ «Կյուրոպեղիայում» բազմիցս հիշատակված հայոց թագավորը երիտասարդ չէ և արդեն ունի ամուսնացած որդի: Ուստի դժվար է «Սակավակյաց» Երվանդին նույնացնել ամուսնացած Տիգրանի տարեց հոր հետ:

2. Երվանդ-Օրոնտաս անունը քաջ հայտնի էր Քսենոփոնին²⁵ և նա «Կյուրոպեղիայում» բազմիցս խոսելով հայոց թագավորի մասին, գեթ մեկ անգամ կտար այդ անունը, եթե իրոք սա կրած լիներ Երվանդ անունը:

3. Խորենացու մոտ Երվանդ Սակավակյացը հիշատակվում է միայն արքայացանկում և թագավորական նոր, այն էլ երկրում առաջին, արքայատոհմի հիմնադրին արժանի ոչ մի գործ չի կատարում: Խորենացին իր մատչանի երկրորդ գրքում ամբողջ երեք գլուխ հատկացրել է հայոց թագավորներից Արտաշես Տիեզերակալի գործերը նկարագրելուն²⁶: Ճիշտ է, Արտաշեսին վերագրված գործերի մի զգալի մասը իրականում կատարված են Կյուրոս Մեծի, Դարեհի և Քսերքսեսի կողմից, բայց մեզ համար այս դեպքում կարևորն այն է, որ Խորենացու Արտաշեսը գործել է Կյուրոս Մեծի (559—529 թթ.), Լյուդիայի թագավոր Կրեսոսի (560—546 թթ.) և աթենացի օրենսդիր Սոլոնի (638—559 թթ.) ժամանակ, մ. թ. ա. VI դ. կեսերին, այսինքն՝ երբ Հայաստանում ըստ Խորենացու արքայացանկի, պետք է թագավորեր Երվանդ Սակավակյացը: Կյուրոսը, Կրեսոսը և Սոլոնը շատ հաստատուն են նստած VI դ. կեսերին, ուստի և նրանց ոչ մի կերպ հնարավոր չէ տեղաշարժել և մոտեցնել Խորենացու Արտաշես Տիեզերակալին. մնում է միակ տրամաբանական ելքը՝ Արտաշես Տիեզերակալին տանել VI դ. և ենթադրել, որ այդ ժամանակ հայոց թագավորի և Տիգրանի հոր անունը եղել է ոչ թե Երվանդ, այլ Արտաշես. հիշեցնենք, որ Խորենացու մոտ Արտաշեսի որդին նույնպես կրում է Տիգրան անունը²⁷, Այս դեպքում մնում է բացատրել Խորենացու մոտ Տիգրանի «Երվանդյան» մականունը, որն անպայման զալիս է հայոց վիպասանքից: Բացատրության բանալին մենք տեսնում ենք Արտաշես Ա-ի վերջերս հայտնաբերված արամեատառ արձանագրություններում, որոնցում Արտաշեսն իրեն անվանում է «Երվանդական» (իմա՝ Երվանդունի): Այս երևույթին տրված մեկնաբանությունը մեզ թվում է համոզիչ²⁸, Հելլենիստական մի շարք երկրների (Պոնտոս, Կապադովկիա, Կոմմագենե) միապետներ, սեփական թագավորական իշխանությունը առավել շուրջ և հեղինակություն հաղորդելու նպատակով իրենց հայտարարում էին Արեմենյաններից սերած: Այդ քայլին դիմել է նաև Արտաշեսը, որը իրեն անվանելով Երվանդական, դրանով իսկ ցանկացել է իր ծագումը բխցնել Արեմենյաններից, քանի որ, աղբյուրների վկայությամբ²⁹,

²⁵ Քսենոփոն, Անաբասիս, էջ 23, 24, 34, 47, 54, 75, 81 և այլու

²⁶ Մոփսես Խորենացի, Բ, ժա-ժդ:

²⁷ Նույն տեղում, ժա-ժդ:

²⁸ Գ. Ա. Տիրացյան, Մովսես Խորենացու: «Հայոց Պատմության» և «Արարոնի» «Նշար-հաղորդյան»: մի քանի տվյալների Հայաստանի ն. մ. թ. 111—11 դարերի պատմության մասին», «Բանբեր Մատենադարանի», 1962, № 6: «Հայ ժողովրդի պատմություն», հատ. 1, էջ 523—530:

²⁹ Strabo, XI, 11, 15:

Օրոնտասը հետևորդն էր Հյուդաոնեսի, որը Դարեհի ղինակից յոթ մեծատոհմիկ պարսիկներից մեկն էր:

Մեր կարծիքով, հիմնավորված չէ նաև այն տեսակետը, թե Արմենիան Աքեմենյանների տերության սատրապություններից մեկը դառնալուց հետո, այնտեղ իբրև սատրապ մնաց հայոց թագավոր Երվանդը: Հավանական է, որ Արմենիայի սատրապը նշանակված լիներ պարսիկ Օրոնտասների (Երվանդների) տոհմից: Նույնքան հավանական է, որ նրա կողքին երկրում շարունակում էր բարձր իշխանություն ունենալ նախկին թագավորը, իսկ հետագայում՝ նրա հետևորդը:

Քսենոփոնի «Անաբասիսում» Հայաստանի սատրապ Օրոնտասի կողքին հիշատակվում է նաև Արտուխասը (ΑΡΤΟΥΧΑΣ), որը, հավանաբար, ղուրավար էր³⁰: Մեր կարծիքով, Արտուխաս անունը նույնն է՝ ինչ Արտաշեսը: Տվյալ ժամանակի հատուկ անունների մեջ սովորական է ու-ա հնչյունափոխությունը (Ուրմե-Արմե, Ուրարտու-Արարատ, Երեբունի-Երևան): Հույները X (խ) տառը արտասանում են հայերեն շ-ին մոտ և պատահական չէ, որ եվրոպական լեզուներում այդ տառը տառադարձվել է ch-ով: Ինչ վերաբերում է Արտուխաս անվան -աս (-ΑΣ) վերջավորության, ապա այն հունարենում բացարձակապես նույնական է -էս (-ΗΣ) վերջավորության հետ:

Եվս մի փաստարկ: Հերոդոտոսի վկայությամբ, Քսերքսեսի պարսկական բանակում գտնվող «արմենները զինված էին փուլուգիացիների նման: ...Սրանց երկուսի առաջնորդն էր Արտոքմեսը (...ΑΡΤΟΧΜΗΣ), որն ամուսնացած էր Դարեհի դստեր հետ»³¹: Մեզ հավանական է թվում, թե ΑΡΤΟΧΜΗΣ անվան M (Մ) տառը պետք է լինի Σ (Ս): Այս երկու տառերի տարբերությունը, ինչպես հեշտ է նկատել, հորիզոնական կամ ուղղահայաց լինելու մեջ է, ուստի և ձևագրերում դրանք կարող էին հեշտությամբ շփոթվել արտագրողների կողմից, մանավանդ, որ Σ տառը շատ հնում գրվել է նաև M ձևով³², եթե այդպես է, ապա կարելի է կարդալ ΑΡΤΟΧΣΗΣ-Արտոքսես-Արտաշես:

Այս ամենը նշելուց հետո մեզ թվում է, թե V—IV դդ. Արմենիայի սատրապ Օրոնտասները տոհմակցական կապ չունեն նախապես Հայաստանում տիրած արքայատոհմի հետ: Հետևաբար, Երվանդունիների թագավորական արքայատոհմը առաջացել է ոչ թե մ. թ. ա. VI դարում, այլ Աքեմենյանների լուծր թոթափելուց հետո՝ IV դ. վերջին քառորդում. իսկ մ. թ. ա. VI դ. Հայաստանում եղել է մեկ այլ արքայատոհմ, որը կարելի է անվանել Արտաշեսյան (կամ Տիգրանյան՝ ըստ Ն. Ադոնցի): Այս արքայատոհմն ընդհատվում է Աքեմենյանների տիրապետության ու Երվանդունիների թագավորության (չուրչ 320—190 թթ.) ժամանակ: Արտաշես Ա-ն, մեր կարծիքով, տապալելով Երվանդ Վերջինին Վերականգնում է VI դարի հայկական արքայատոհմը:

³⁰ Xenoph. Anab., IV, 3, 4:

³¹ Herodot., VII, 73.

³² Տե՛ս Μεγαλη Ἑλληνική ἐγχειροποίητα Πινδου Δρακοαχτ. τομος IV, Ἀθῆναι, Ἀλφαῖητος հոդգածր, էջ 108—111, աղյուսակ 1 և 4:

ЦАРСКАЯ ДИНАСТИЯ ОРОНТИДОВ В АРМЕНИИ

С. М. КРКЯШАРЯН

(Резюме)

В арменоведении укоренилась точка зрения о том, что после падения Урарту (начало VI в. до н. э.) до конца царства Аршакидов (первая четверть V в. н. э.) армянский престол последовательно находился в руках династии Оронтидов (Еруандуни), Арташесидов и Аршакидов. В настоящей статье сделана попытка новой интерпретации исторических данных.

После падения Урарту на Армянском нагорье властвуют Арташесиды (или Тиграниды) до того, как Армения превратилась в ахеменидскую сатрапию. В сатрапской Армении, наряду с сатрапом Ороном, можно видеть и представителя прежней династии Арташесидов. После Ахеменидов, в конце IV в. до н. э., в Армении устанавливается царство Оронтидов (Еруандуни). В начале же II в. до н. э. Арташес, свергнув Орона последнего, восстанавливает армянскую династию VI в.